



Center da sport, implant da sfradar - reparatura sistem d'öli e ventils da sgürezza

L'indriz da sfradar il glatsch es 26 ons vegl ed as cumpuona our da duos cumpressurs. Il sistem d'öli d'ün da quels duos cumpressurs nu funcziuna plü e sto gnir reparà. Al listess mumaint ston gnir rimplazzats ils ventils da sgürezza. Quista reparatura es pel manaschi da l'indriz indispensabel. L'incumbenza es gnüda surdatta a la firma Walter Wettstein AG, Gümlingen.

Center cumünal, refacziun tet cun indriz fotovoltaic - dumonda da princip e surdatta da lavur

In occasiun da la sanaziun dal tet dal Center cumünal esa previs da realisar eir ün indriz fotovoltaic integrà illa vetta da surfatscha dal tet. La suprastanza cumünala ha acconsenti a la dumonda da princip e surdat las lavurs a la ditta Foffa Holzbau AG, Zernez.

Sanaziun sarinera Zernez - proget da fotovoltaica - decisiun da proget e surdatta da lavur

In connex cun la fabrica da la sanaziun da la sarinera a Zernez e cun quai cun la fabrica dal nouv stabilimaint plü grond vaiva la suprastanza cumünala decis i'l 2022 da vulair stabilir sül tet e per part vi da la fatschada da quel stabilimaint nouv, ün indriz fotovoltaic per prodüer forz'electric. La suprastanza cumünala ha dat glüm verda a l'inizi dal proget e surdat la furniziun e montascha da l'indriz a la firma Solaris-Swiss PV AG, Cham. Inavant es gnüda surdatta la furniziun d'ün indriz per dosar la craida a la ditta Hug Mühlen- und Maschinenbau AG, Bützberg.

Sanaziun punt Madinas - dumonda da princip e surdatta da lavur

La punt Madinas, Zernez es in ün fich nosch stadi e sto gnir rimplazzada. Id es previs da cumanzar culla progettaziun da prümavaira 2024. Sün basa d'ün'occurrèza publica da l'on 2004 sun già gnüdas elavuradas variantas e basas chi pon gnir trattas a nüz per l'elavuraziun dal proget. La dumonda da princip es gnüda acconsentida e las lavurs d'indschegner sun gnüdas surdattas a la firma indigena, Statix Plus GmbH, Zernez.

Sistem manisaziun (Prozessleitsystem), Susch - dumonda da princip, glista da submittents e surdatta da lavur

Pel provedimaint d'aua da baiver da Susch manca amo per gronda part ün sistem da manisaziun e controlla. Il proget prevezza da cumplettar quista manisaziun e d'optimar tras quai eir la reserva d'aua d'adöver e da fö. Per la manisaziun electronica faja dabsögn d'aggiundscher plüs stabels cun colliaziuns da fibr'optica, sco eir forz'electric. Plüssas armaturas ed indriz dal provedimaint d'aua ston gnir modernisats e rimplazzats per integrar las cumponentas necessarias dal sistem da manisaziun. L'execuziun dal proget es previs d'ürant la stà ed utuon 2024. Il gremi responsabel ha acceptà l'inizi dal proget e sancziunà la glista da submittents per las lavurs descrittas. Implü es gnüda surdatta la lavur da furniziun e montascha electrica e da fibr'optica a l'EE-Energia Engiadina, Scuol.

Clucher Zernez - reparatura indriz da sains e digitalisaziun sains - surdatta da lavur

D'ürant l'ultima controlla es gnü chattà ün s-charp illa rouda da manisaziun d'ün sain dal clucher a Zernez. Ils perits han sün quai propouñü da rimplazzar la maschina dals sains, uschè cha'l rimplazzamaint da la rouda da manisaziun dal sain crouda davent. In cumbinaziun as vuol proseguir güst'eir cun la digitalisaziun da la manisaziun dals sains dal clucher. Las lavurs sun gnüdas surdattas a la firma specialisada Muff Kirchturmtechnik AG, Triengen.

Iglüminaziun publica - progets 2024 e credit extraordinari

Il proget da rimplazzamaint da l'iglüminaziun publica in LED va illa fasa finala. Actualmaing sun da raduond 300 glüms rimplazzadas 250. Il gremi ha acceptà l'inizi da proget per cuntinuar cun la transcha da rimplazzamaint dal 2024. Sper la transcha dal 2024 ha la suprastanza cumünala deliberà ün credit extraordinari per sviluppar ils duos proget d'iglüminaziun publica in Ils Muots Sura, Brail ed in Tarsous, Zernez. La furniziun da las glüms LED es gnüda surdatta a la firma Elektron AG, Au. La montascha vain manada tras per part dals collavurats da cumün e per part da l'EE-Energia Engiadina, Scuol.

Carta culs noms rurals da la fracziun da Susch - credit extraordinari

Analog a la carta culs noms rurals da la fracziun da Lavin es gnü elavurà tras Daniel Bulfoni cun sustegn dal Parc Naziunal Svizzer üna carta per la fracziun da Susch. La direcziun operativa ha deliberà ün credit supplementar in l'import da 2'000 chf pel squitsch da las 1'000 cartas culs noms rurals da la fracziun da Susch. Eir in quist cas survegnan tuot las chasadas a Susch ün exemplar gratuit.

Burning Mountain - permiss

La suprastanza cumünala ha acconsenti a la società Burning Mountain il permiss per manar tras il festival d'ürant ils 27 fin 30 g'ün 2024.

MMLP Engadin Outdoor Center GmbH - permiss

La direcziun operativa ha acconsenti a la firma MMLP Engadin Outdoor Center, Zuoz il permiss per imbarchar in duos lös sül territori dal Cumün da Zernez d'ürant las stagiuns da stà, dal 2024 fin dal 2027.

Engiadina Truck Treff - permiss

Il Cumün da Zernez ha concess a l'organisaziun Engiadina Truck Treff il permiss per manar tras il seguond Engiadina Truck Treff chi varà lö in sonda, ils 3 avuost 2024.

Il Cumün da Zernez ha acconsenti ils seguaints permiss da fabrica:

Parcella no. 0171, Roner Armando e Gunsch Sabrina, Zernez – sanaziun ed ingrondimaint balcon, rimplazzamaint fanestra

Parcella no. 2106, Christoffel Guido e Renate, Susch – restructuraziun chasa no. 9 / sanaziun energetica

Parcella no. 3015 e no. 3442, Cumün da Zernez – rimplazzamaint s-chodamaint scoula, Lavin

Parcella no. 3420, STWEG Chasa Laret 5-7, Lavin – chamonna d'üert, dumonda suotpassar masüra min. da cunfin

Suprastanza cumünala in fracziuns

In marcurdi, ils 3 avrigl 2024 vain organisà il quart inscunter da la suprastanza cumünala cun la populaziun suot il nom «suprastanza cumünala in fracziun». L'inscunter ha lö a partir da las 20:00h in l'Hotel a la Staziun, Zernez. La suprastanza cumünala infuorma a moda libra tanter oter sur da divers progets illa fracziun da Zernez e sta a disposiziun per dumondas e discussiuns da las votantas e votants da tuot il perimeter dal Cumün da Zernez.